

Si bo ta wak malo wordo haci y bo no ta haci nada, abo tambe tin culpa



UTRECHT -Mi hendenan! Awe mi ta bin cu un topico cu masha tempo mi mester a trece dilanti. Pero mi di, laga tur e fanfaria di dia internacional di hende muhe pasa pa despues mi trece boso bek na e realidad. Claro muhenan nos ta fuerte, pero hopi biaha nos ta vulnerabel tambe.

Ta berdad cu mi prome aña na Hulanda mi no a traha. Mi a opta pa enfoca completamente riba mi bida di estudiante y disfruta un tiki. Esey a payoff pasobra den un aña mi a haal mi propedeuse y tur cos tabata great. Pero manera despues del gusto biene el susto, e high di e bida di estudiante a wear off y realidad di bida na Hulanda a settle in. Ainda asina, I wasn't really having a horrible time. Te ora cu algo realmente horibel a sucede cu mi.

Desde e dia ey, e idea di ta na Hulanda a keda bira mi stoma. Mi a cuminsa haya heimwee pisa y den un manera mi a haya rabia contra tur hende tambe na e pais aki. Mi tabata bisa mi mes 'na Aruba, nunca algo asina lo pasa cu mi'.

Awo mi hendenan, locual mi ta bay conta boso ta algo cu mi a conta podise un hende so pasobra te hasta recorda e momento aki ta haci mi malo. Mi no a skirbi derover nunca pasobra mi tabata tin asina tanto miedo di ripiti e trauma y mi mester a warda e sentimento pasa, pa mi por skirbi tocante e caso aki den un manera neutral. Tabata e dia prome

cu mi trip pa Madrid cu mi amiga Jessy. Mi a top'e na e bistro unda e ta traha pa mi entrega algo. Despues mi cana bay den central pa haci un transaccion bancario. Mi tabata para den e rij wardando mi turno. Eynan ta unda mi a topa un hoben Marrocano cu ta bay mi mesun scol. Mi no necesariamente conoce bon, pero e tin cabey grandi krul mescos cu mi y tur ora nos wak otro nos tabata sonrei y compliment otro su cabey.

Sorprendi pa wak un cara familiar den ciudad cual ta algo cu nunca ta pasa, mi a bay dun'e un brasa y papia un tiki cu ne. Eynan ta ora un homber grandi cu un boter di biña den man, a para su tras y pone un man na e hoben su pecho y fula esaki.

Babuca pa locual a pasa, e ta move un banda bisa e homber hala pero e homber ta keda sigui e. Na dado momento, temblando, cu miedo toch mi a para e hoben su dilanti pa protege y mi a bisa e homber ga weg. E homber burachi vies, a keda para nos dilanti cu su boter den man prome cu su amigo a grit'e pa e bay.

Tur cos a pasa asina lihe. E hoben temblando pasobra el a experiencia acoso sexual den pleno luz di dia, ami temblando pasobra mi no por a haci nada pa evita esaki. Dje nos a bay sinta un caminda bebe te pa calma nervio y comenta riba locual a tuma luga.

E ta conta mi cu e nunca den su bida a yega di experiencia algo asina y cu e

tabata sinti manera cu el a wordo horta di su paz.

Awo, podise lesando esaki e no ta zona dje erg ey, podise boso lo pensa mi ta exagera.

Pero locual di berdad tabata a haci mi dolor ta cu nos tabata rond di hopi hende, te hasta otro hende homber cu a para wak un homber burachi intimida dos hoben femenino, acusa un sexualmente y niun hende a haci nada. Nan a gewoon bira nan cara manera cu nos tabata existi. Awo si e homber lo a bira violento? Awo si e lo a dal mi cu e boter di alcohol cu e tabata tin den su man? Esey tabata e dia cu mi e soño Hulandes a caba pa mi tambe.

No cu precisamente mi tabata tin e algun dia. Pero mi a desilusiona di un manera asina grandi.

Mi tabata pensa, na Aruba un hende lo a bisa algo. Na Aruba un hende lo a para pa nos, na Aruba nunca nunca hende lo wak otro hende haci otro daño y no bisa nada. E tabata comenta cu nan Maroco tampoco algo asina lo sosode sin cu ningun hende lo reacciona.

Esey tabata e dia cu mi a realiza cu mi por muri mes dilanti hende na e pais ki y niun hende lo worry. Despues di esey, mi a cana cu asina hopi miedo pa simannan largo. Mi no por a drumi. Mi tabata lanta memey di anochi wak si mi porta ta gelock. Panico, panico 24/7, miedo di keda afo te laat, miedo di cana mi so, miedo, miedo.

Check patras di mi cortina, check patras di cama. Ta manera cu e homber ey a bira un sombra cu tabata persigui mi y ora mi a bay Mardid cu Jessy mi tabata tin miedo di tur hende homber cu tabata acerca nos tambe. Jessy no tabata por comprende mi trauma, ami no tabata tin e palabranan corecto pa conta e storia.

E storia a bira largo mi hendenan, pero locual mi kier laga cla ta cu ora hende muhe ta bisa cu homber no ta sirbi nos no ta solamente referi na e trato cu nan ta duna hende muhe. Si no mas bien cu hende homber por letterlijk wak otro hende homber haci daño na un dama y actua manera cu no ta su problema. We say all men, because all women are scared. Mi ta soña cu un bida unda mi curpa no ta un target, unda cu e no ta un invitacion pa wowonan of mannan straño purba touch mi di manera inapropia.

Feminista, anarkista, rebelde sin pausa, delaster un nomber poderoso y asina mes mi mester a enfrenta mi realidad cu mi no por bringa un homber. Cu semper cu mi lo ta vulnerabel na violencia, na acoso sexual, na cualkier caminda, den cualkier paña cu mi tin bisti.

Pa finalisa e storia den un tono mas amigabel, laga mi traduci un pida di e poema di mi escritornan favorito esta Yesika Salgado. "Bida a siña mi cu muhenan ta esunnan cu e magia, e stem di Dios. Esunnan cu ta trece mi bek cerca di mes. E muhenan. E Bruhanan.

Mi conoce nan tur. Mi ta pertenece na cada un di nan". Hopi biaha, esun cu lo para banda di den e lucha contra tur tipo di maltrato, lo ta un hende muhe pasobra e ta esun di berdad por identifica cu bo dolor. Muhenan, mundo ta pone nos competi cu otro y haya di otro pasobra hunto nos ta fuerte.

